

MEMORANDWM CYDSYNIAD DEDDFWRIAETHOL ATODOL (MEMORANDWM RHIF 2)

Y BIL TROSEDDU DIFRIFOL

1. Gosodir y Memorandwm Cydsyniad Deddfwriaethol hwn o dan Reol Sefydlog ("RhS") 29.2. Mae RhS29 yn rhagnodi bod rhaid gosod Memorandwm Cydsyniad Deddfwriaethol, ac y ceir cyflwyno Cynnig Cydsyniad Deddfwriaethol, gerbron Cynulliad Cenedlaethol Cymru os yw Bil Seneddol y DU yn gwneud darpariaeth mewn perthynas â Chymru at bwrpas sydd o fewn cymhwysedd deddfwriaethol y Cynulliad Cenedlaethol neu sy'n addasu'r cymhwysedd hwnnw.
2. Cyflwynwyd y Bil Troseddu Difrifol (y "Bil") yn Nhŷ'r Arglwyddi ar 5 Mehefin 2014. Gellir gweld copi o'r Bil yn:

<http://services.parliament.uk/bills/2014-15/seriouscrime.html>

Crynodeb o'r Bil a'i Amcanion Polisi

3. Noddir y Bil gan y Swyddfa Gartref. Amcanion polisi Llywodraeth y DU mewn perthynas â'r Bil yw sicrhau bod gan asiantaethau gorfodi'r gyfraith bwerau cyfreithiol effeithiol i ymdrin â throseddu difrifol a threfnedig.
4. Mae i'r Bil chwe Rhan:
 - Mae Rhan 1 yn gwneud darpariaeth mewn perthynas ag adennill eiddo sy'n dod o enillion trosedd.
 - Mae Rhan 2 yn diwygio Deddf Camddefnyddiau Cyfrifiadurol 1990.
 - Mae Rhan 3 yn darparu ar gyfer trosedd newydd, sef cymryd rhan yng ngweithgareddau grŵp troseddau trefnedig ac yn atgyfnerthu'r trefniadau ar gyfer diogelu'r cyhoedd rhag troseddau difrifol a gweithgarwch sy'n ymwneud â gangiau y darperir ar eu cyfer yn Rhan 1 o Ddeddf Troseddu Difrifol 2007 a Rhan 4 o Ddeddf Plismona a Throsedd 2009 yn y drefn honno.
 - Mae Rhan 4 yn darparu ar gyfer atafaelu a fforffedu sylweddau a ddefnyddir fel cyfryngau i dorri cyffuriau.
 - Mae Rhan 5 yn diwygio'r gyfraith mewn perthynas â throseddau creulondeb i blant ac anffurfio organau cenhedlu benywod, sy'n darparu ar gyfer gorchmynion diogelu rhag anffurfio organau cenhedlu benywod ac yn creu trosedd newydd, sef bod â "llawlyfrau i bedoffilyddion" yn eich meddiant.
 - Mae Rhan 6 yn darparu ar gyfer awdurdodaeth alldiriogaethol neu ei hestyn mewn perthynas â'r troseddau yn adrannau 5 (paratoi ar gyfer gweithredoedd terfysgol) a 6 (hyfforddi ar gyfer terfysgaeth) o Ddeddf Terfysgaeth 2006 ac yn rhoi cymeradwyaeth Seneddol (fel sy'n ofynnol

o dan adran 8 o Ddeddf yr Undeb Ewropeaidd 2011) ar gyfer dau Benderfyniad drafft gan y Cyngor o dan Erthygl 352 o Gytuniad ar Weithrediad yr Undeb Ewropeaidd. Mae Rhan 6 hefyd yn cynnwys mân ddiwygiadau a diwygiadau canlyniadol i ddeddfiadau eraill a darpariaethau cyffredinol, gan gynnwys darpariaethau ynglŷn â chymhwyso tiriogaethol a chychwyn.

Darpariaethau yn y Bil y ceisir cydsyniad yn eu cylch

5. Ceisir cydsyniad y Cynulliad ar gyfer y gwelliannau a gyflwynwyd gan Karen Bradley, Gweinidog Caethwasiaeth Fodern a Throseddau Trefnedig, yn Senedd y DU ar 8 Ionawr 2015, sy'n cyflwyno darpariaeth newydd ynglŷn â 'Controlling or coercive behaviour in intimate or family relationships'. Ceir manylion y gwelliant yn yr Hysbysiadau o Welliannau a gyflwynwyd ym Mhwyllgor y Bil Cyhoeddus; cyflwynwyd y rhestr hon gerbron y Senedd ar 8 Ionawr 2015.
6. Mae gwelliant NC9 yn mewnosod cymal newydd yn y Bil Troseddau Difrifol sy'n creu trosedd newydd, sef ymddygiad cyfyngol neu orthrechol mewn perthynas â cham-drin domestig. Y diben yw ei gwneud yn drosedd i berson sy'n ymddwyn yn fynych neu'n barhaus mewn ffordd "controlling or coercive" yn erbyn person arall sydd â chysylltiad personol ag ef, fel y'i nodir yn is-adran (1). Mae is-adran (2) yn diffinio "Personally connected" fel pobl mewn perthynas bersonol agos neu sy'n byw gyda'i gilydd ac sy'n aelodau o'r un teulu neu a fu mewn perthynas bersonol â'i gilydd gynt.
7. Mae is-adran (3) yn nodi nad yw person A yn cyflawni trosedd os oes ganddo gyfrifoldeb rhiant dros berson B. Mae is-adran (4) yn disgrifio ymddygiad person fel un sy'n cael "serious effect" os yw person A yn peri ofn y bydd trais yn cael ei ddefnyddio ar berson B, ar o leiaf ddau achlysur, neu fod yr ymddygiad hwnnw yn achosi cymaint o fraw neu ofid nes y bydd yn cael effaith andwyol ar weithgareddau person B o ddydd i ddydd.
8. Mae is-adrannau (6) a (7) yn darparu diffiniadau o'r hyn a olygir gan 'members of the same family', 'civil partnership agreement', 'child', 'relative' a 'parental responsibility, at ddibenion y cymal newydd hwn.
9. Mae is-adrannau (8) i (10) yn nodi'r achos dros amddiffyniad mewn achos llys a'r dystiolaeth sy'n ofynnol mewn perthynas ag amddiffyniad. Mae is-adran (11) yn nodi y bydd modd rhoi dedfryd o hyd at bum mlynedd o garchar ar gyfer y drosedd newydd pan fo person yn cael ei gollfarnu ar ddiad.
10. Mae'r ddarpariaeth yn gymwys mewn perthynas â Chymru a Lloegr.
11. Ym marn Llywodraeth Cymru, mae'r darpariaethau sy'n ymwneud â throsedd ymddygiad cyfyngol neu orthrechol yn dod o fewn cymhwysedd deddfwriaethol Cynulliad Cenedlaethol Cymru i'r graddau ag y maent yn ymwneud â "Prevention, treatment and alleviation of disease, illness, injury disability and mental disorder"; "Social welfare including social services"; a

“Care of child children, young adults, vulnerable persons and older persons including care standards” o dan Ran 1 o Atodlen 7 i Ddeddf Llywodraeth Cymru 2006.

Manteision defnyddio'r Bil hwn yn hytrach na deddfwriaeth y Cynulliad

12. Ym marn Llywodraeth Cymru, mae'n briodol ymdrin â'r darpariaethau hyn yn y Bil hwn i'r DU gan mai hwn yw'r cyfrwng deddfwriaethol mwyaf ymarferol a chymesur er mwyn galluogi'r darpariaethau hyn i fod yn gymwys mewn perthynas â Chymru. Mae natur gydgysylltiedig y system cyfiawnder troseddol yng Nghymru a Lloegr yn golygu ei bod yn fwy effeithiol a phriodol i'r ddarpariaeth gael ei chyflwyno ar yr un pryd yn yr un offeryn deddfwriaethol.

Goblygiadau ariannol

13. Nid oes unrhyw oblygiadau ariannol i Lywodraeth Cymru.

Leighton Andrews AC
Y Gweinidog Gwasanaethau Cyhoeddus
Ionawr 2015